

He kahupapa waka, he kaupapa whenua, whakaeke mai

Tauira Terenga Waka o Tuia 250



Kōrero Whakamārama mā runga i ngā Waka

Ngā aronga mō ngā Tauira Terenga Waka o Tuia 250



Hauora me te Haumaru

He mea nui kia whai ngā *Tauira Terenga o Tuia 250* i ngā tohutohu a ngā kaihautū me ngā kaumoana o ia waka, i ngā tikanga hauora, haumaru hoki o ia waka.

Te Pakari me Te Ora

Me eke ngā *Tauira Tuia 250* ki te iti o te pakari me te ora e rite ana mō ngā mahi i runga waka. Me tuku mai e ngā kaitono ngā kōrero mō rātou e hāngai ana ki ēnei āhuatanga.

He rerekē te whāinga kaukau mō ngā *Tauira* mō ia waka – tērā me tere noa ngā *Tauira* i runga i te wai mō ētahi, tērā me 100 mita te roa o te kaukau āwhina-kore mō ētahi. Me whakamōhio mai e ngā kaitono o rātou āhei mō tēnei āhuatanga ki roto i te puka tonu.

He nui ngā mahi kaiuaua hei mahi mā ngā *Tauira*. Me whāki mai e ngā kaitono o rātou māuiui e mōhiohia ai ngā waka mēnā e rite ana te tangata mō te mahi i runga waka. Tērā me whai puka hauora ngā kaitono mō ētahi o ngā waka.

He mea tohe hinengaro hoki te noho mā runga waka – nā reira me pakari anō te hinengaro *Tauira* ki te mahi i ngā mahi.

He wāhi anō mō te hunga whaikaha ā-tinana, ā-hinengaro anō i roto i te *Terenga Waka Tuia o 250*. Me tuku kōrero mai e te hunga nei mō o rātou āhuatanga ki te Manatū Taonga. Ka tirohia ēnei tono e ngā rōpū e tika ana mō te whakamātautau i o rātou āhei ki te uru mai.

Ngā Mahi i Runga Waka

Ko te whāinga mā ngā *Tauira Terenga Waka o Tuia 250* ko te uru atu ki ngā mahi e whai ake nei:

Ngā mahi; he whakapaipai; he whakatikatika; he mahi rikini; he tiaki waka; whakawhiti i waenga mōkihi, poti hoki, ki uta, ka hoki ki te waka i tai.

Ngā mahinga: he kaukau ata, he hīkoi, he wānanga, he kōrerorero, he waiata, he uru ki ngā mahi a te hāpori.

Me mātua tutuki i ngā *Tauira* ngā mahinga katoa o te kaupapa whakangungu *Tauira* o te *Terenga Waka o Tuia 250*

Ngā Āhuatanga Noho

Tērā e uaua ai te noho i runga waka mō tētahi wā roa nei, ā, ka uaua anō kia taunga ētahi tāngata ki tērā āhuatanga. He kōpipiri te noho, nā reira me tau ngā *Tauira* ki te noho piri pērā ki te tauhou.

He rerekē te rahi o ngā waka, ā, he pērā anō te rahi o ngā kapa kaumoana o runga – 10 mō ētahi, 50 mō ētahi atu. Nā reira me whakamōhio mai e ngā kaitono, tokohia te rahi o ngā tāngata e tau pai ai ia ki te noho tahi i runga waka.

Tērā ētahi waka e taea ai te whāngai tāngata ki te kai e rite ana mō te nuinga o ngā tāngata, heoi anō ētahi he uaua kē kia pērā te whānui o ngā momo kai hei whāngai tangata. Nā reira me whakamōhio mai e ngā kaitono o rātou whiringa kai, ā rātou kai hoki e māriu ai, tae atu ki ngā kai kāore rātou i te kai (hei tauira: kaimoana, mīti, hua miraka, te aha noa...)

He putanga moana, he whiunga nō ngā huarere o te wā. Kia haria mai e ngā *Tauira* ngā kākahu me ngā taputapu e rite ana mō te noho i runga waka. Mā ngā *Tauira* tonu ā rātou ake

utauta e whakarite, heoi ka āwhinatia e te Manatū Taonga kia mōhiohia ai me pēhea te whai moni hei hoko.

Ngā Ture me Ngā Whakaritenga

Kei ia waka ōna ture me ōna whakaritenga, nā, me mātua whai rawa e ngā *Tauira Terenga Waka Tuia o 250* ēnei āhuatanga. Taihoa rā ka āta whakamōhiohia mai ko ngā *Tauira* whai tūranga, heoi anō kei raro nei ētahi o aua ture e rārangitia ana kia mārama ai ngā kaitono ki ēnei āhuatanga:

- Kāore e whakaaetia te whakamahi waea kawae, papahiko, taputapu hiko atu rānei, engari anō te kāmera
- Kāore e whakaaetia te mau, te kai waipiro, taru kino, hikareti rānei ki runga waka
- Kāore e whakaaetia te kangakanga, te whakatumatuma rānei i runga waka, ki te kapa kaumoana, ki ētahi atu *Tauira* rānei.
- Kāore e whakaaetia kia mau tohu kaka kēne, kia whai whanonga kēne rānei i runga waka
- Tērā ētahi tikanga mau kaka i runga waka, arā, pērā i te mau kaka kaukau, hū hoki e rite ana
- Me mau ngā *Tauira* ki ngā tohutohu a ngā kaihautū me ngā kapa kaumoana o ngā waka
- Me kaha ngā *Tauira* ki te uru atu ki ngā mahi katoa

Kei te pā ipurangi o *Tuia 250* ētahi kōrero anō mō ia waka.

Ngā Paearu Kōwhiri

Ngā Āhuatanga Tangata e Tika ana

Ko tētahi o ngā takohanga o te Manatū Taonga ko te whai *Tauira* e tika ana hei whakakī i ngā tūranga *Tauira*. Hei āwhina i tēnei nā, ka noho mā ngā pātai whakautu roa e toru a ngā kaitono kei reira e āta kōrerotia ana mō rātou anō, ō rātou takatūranga, tūmanako hoki, e whakataua ko wai hei *Tauira*.

Kei te kimihia e te Manatū Taonga he kaitono e tino mārama ana, e kaingākau hoki ana ki ngā kaupapa o *Tuia 250*, he kaitono whai pūkenga auaha hoki, piri hoki ki ō rātou hapori, hapū, iwi rānei.

Whai Tikanga

Ko tētahi mea nui o te *Terenga Waka o Tuia 250* ko te whai i ngā āhuatanga o Te Ao Māori, te ako, te whai hoki i te mātauranga Māori.

Ehara i te mea me mōhio koe ki ngā āhuatanga o Te Ao Māori, engari me mātua aro koe ki te ako, ki te whai hoki i ngā tikanga o te terenga.

Me mātua uru atu ngā *Tauira Terenga Waka Tuia o 250* ki ngā pōwhiri i te taunga heke o ō rātou ara terenga, ki te ako i ētahi waiata, karakia hoki, ki te ako me te whai hoki i ngā kawa me ngā tikanga marae.

Ka āwhinatia, ka tautokona hoki ngā *Tauira* i roto i ēnei tū mahi.

Ngā Takohanga o ngā *Tauira*

Ngā Whakaaetanga me ngā Tikanga Whakahaere

Ka waitohua e ngā *Tauira* whai tūranga he tikanga whakahaere e whakaae ana ki ngā ture me ngā whakaritenga o ngā waka, e ū hoki ai rātou ki te whakatutuki i te wāhi ki ngā ara terenga i whakaritea ai.

Ka tohua anō e ngā *Tauira*, ki te kore e tutuki i a rātou ngā tikanga whakahaere o ō rātou waka, tērā e puta ai rātou i te kaupapa, ka heke i te waka i te ūnga tata ki uta, ā, mā rātou anō e whakarite te hokinga ki te kāinga.

Me mōhio anō ngā kaitono, kāore he takohanga o ngā waka mō ngā taputapu ka pakaru, ka ngaro, ka tāhaetia rānei, ā, kāore hoki he herenga o ngā waka ki te heipū ka whara ngā *Tauira*. E mea ana kia whai inihua rātou, ā, me mātua whai inihua haerēre i runga i ētahi o ngā waka.

Mau kāmera ai ia waka i te terenga me te whakahaahua haere i ngā mahi e mahia ana. Heoi tērā e mau ai ngā āhua o ngā *Tauira* i ēnei mahi. Nā reira me whakaae mai ngā *Tauira* kia whakamahia āua āhua e Te Manatū Taonga mō ngā mahi whakanui kaupapa. He kōrero atu anō mō tēnei take kei te wāhanga o te puka tono e kīia nei ko Ngā Whakaahua, Kiriata, Rauemi Tono.

Ngā Utu

Mā te Manatū Taonga e pīkau ngā utu mō te terenga me ngā pōwhiri. Tērā anō ētahi utu hei pīkau mā te *Tauira*:

- Te utu mō te haere ki te wāhi eke waka
- Te utu mō te haere i te wāhi heke waka
- Te utu mō te nohoanga i mua, i muri hoki i te ara terenga (kāore he utu mō runga ake i te waka)
- Te utu mō te kai me ērā atu mea i mua, i muri hoki i te ara terenga
- Te inihua haerēre (me mātua whai inihua mō ētahi waka, he mea tūtohi kē mō ētahi)
- Te utu mō te haere ki te tākuta ki te kimi tiwhikete rongoā (me mātua whai mō ētahi waka)
- Ngā utauta me mātua mau

Ka moata rawa te whakamōhioatanga atu i ngā hua o te tono a te kaitono kia whai taima a ia ki te penapena moni hei utu i ēnei utu. Ko tā te Manatū Taonga he āwhina kia mōhioatia ai te kaitono me pēhea.

Te Haere

Hei whai i ngā kōrero o runga ake, mā ngā kaitono whai tūranga ā rātou ake haerenga e whakarite mō ō rātou ara terenga, ki te taunga waka, i te taunga waka hoki. Me tuku mai e ngā *Tauira* 17 tau te pakeke heke iho, ngā kōrero mō ā rātou whakaritenga wehenga i ngā taunga waka e heke ai rātou (ka tīkina atu rātou e te matua, kaitiaki rānei, ka hoki rānei ki te kāinga mā runga momo waka kē atu).

Kua whakataua ngā whakaritenga o te terenga waka o te Kahupapa Tuia 250, engari, nā te āhua o te whakaterere waka, ngā huarere o te rangi, te taimoana hoki, tēra e ū tōmuri ai ngā waka ki ngā taunga. Nā whai anō ka raru pea ngā whakaritenga haere, nohoanga tuatahi a ngā *Tauira*. Ka āwhinatia e te Manatū Taonga ngā kaitono whai tūranga kia pai ai te whakarite. Heoi me mātua whakaae mai ngā kaitono whai tūranga ki ēnei āhuatanga ki te heipū ka raru ko rātou, me te whakaae hoki ka kore e pīkauhia ēnei utu e te Manatū Taonga.

Te Tuku i ō Kōrero

Hei te mutunga o te terenga, me mātua waihanga e ngā *Tauira Terenga Waka o Tuia 250* he momo rauemi hei whakaatu i ā rātou takatūranga terenga. Tērā pea he paku kiriata, he tuhinga, he puka whakaahua, he mahinga toi, he kanikani, he waiata rānei – kei te *Tauira* te tikanga me pēhea te tuku i ana kōrero. Ka tukuna ēnei kōrero ki te Manatū Taonga hei rauemi whakanui, whai pūrongo hoki.

